

Lai foinne



Lai foinne

Les tchairboûennies di temps péssè ne sont pus qu'în vaigue seuvni. Pouétchaint, di tchairbon nos en ins tot piein odjoiyie dains les an-nèes de dyierre, mains dje bîn en devaint po faire mairtchie les grôsses îndustries. Nos ins encoué tus en mémoûere, sutot nos les pus véyes, les guîmbardes pe les teufs des an-nèes trente-cîntche è quairante. Êtchipès de sôtches de ronds fouénas que mairtchaînt â tchairbon de bôs; aiccreûtchies end'feûs des mécâniques, nos, nos djâsaînt de gazogène! Ès femaînt.. mains aivaînt prou de chtimoutz po les faire aivaincie.


Adj'd'heu le tchairbon de bôs ât encoué odjoiyie pai quéques méties, ente-âtres les mairtchâs-farrants de tchvas. Prode di tchairbon de bôs â l'ancîne ât pus qu'în métie, ç'ât ène pâssion. Mainme po cés qu'en vétchaînt dains le temps cmen m'ê raicontè îñ véye tchairboûennie qu'en aivait fait son dgeaingne-pain po éyeûvaie sai rote.

ç'ât â long de lai rvîre di Doubs que se trovaînt le pus de tchairboûennies. Cobîn de foinnes int lèssie loûes môles de vâzon crâmaie ? Ène aïsstè de foinne était odjoiyie tot di temps qu'è y aivait de bôs è tchairboûénaie. Lai côte ât grebi d'aibres (hétre, fô, fréne) les aibres è feuyaidge ç'ât le fîñne-meux è tchairboûénaie, pe l'âve ât è pouétchaie de main.

Devaint d'ècmencie ène foinne, le tchairboûennie retchri îñ empiacement que feuche piait, aîsie d'aippreutche, prou éleûchaie pon trap feûs des copes de bôs. Aivô les maîtéres trovaie su pi-aice è se construt ène cabouénatte. Ç'ât lî qu'è vais vétche, dre-mi, faire sai tcheusenne ène bouenne boussiatte de snaines. Pe, de côte è construt aito ène djèviôle po rédire ses utis, sai biatte. Â chain de lai rvîre, çolî sré prâtiche, pouéchque de l'âve, è vais


en odjoiyie, po ses bésains, mains aito po aittairdgie le cossnaid-ge di bôs de lai foinne. Le tchaintie pe le leudgement aipontie, ène tchâvouenne ât enfûelè, tot piein de brésas vaint êtres odjoiyies po empare le tchure de lai foinne. Mains po emfûelaie le tchure de lai foinne, è fât d'aibôd lai construre!

Le bôs que sré rédut en tchairbon ât prât. Entéchie en soiche âtoué de l'aissoidge de lai foinne, è se trove è pouétchèe de main di tchairboûennie. Po ène foinne de vînt-cîntche stères de bôs è fât aipontie lai piaice: révaie dains îñ soiche de ché mètres de diamètre le vâzon pai mottets de tchînze su tchînze centimètres pe trente de profondjou pe les botaie d'ène san po les odjoiyie pus taîd. Â moitan di soiche, îñ pâ prou couéyat â piaintè, è sré retirie en fîñ di montaidge de lai foinne. Le canâ léssie pai le pâ siéré tot sîmpyement de tchemnèe en lai foinne.



En les croûesaînt, des trocats sont aimoncelès âtoué di pâ su ène hâtou de doux mètres. Tot pyain, aivo sné, des rondîns de moiÿînes graintou sont drassis côte les trocats, aivo le tcheusin de ne pôn tchairdgie d'ène san pus que de l'âtre, çoci po envouadjaie lai foinne de pentchie. Tchain lai foinne é aî po prés doux mètres de lairdgeou, le tchairboûennie aidjoute ène coutche de petéts bôs po boûetchi, aitaînt que possible, les ptchus entre les rondîns pe les quoitchelaidges. Le traivaiye ât pus sôlaint è feure et è mesure de l'enté-chelaidge di bôs, tros étaidges, çolî fait hât! Â derri étaidge, les bôs sont pus coués pe loidgirement entchaipiaie po baiÿie sai fôrme airrondie è l'ôvraidge. Aivo le mainme tcheusin di traivaiye bîñ fait, l'hanne tchegne totes les éleûches entre les bôs aivo de lai mosse d'aibôd, encheute tote lai foinne ât rtchevrie d'ène épâsse coutche de mosse, des mottets préyeuvès â dépaît po l'aissoidge de lai foinne. Totes les éleûches sont tchegnie de

faisi retieuyi d'ène ançine foinne pe réssoiyie è vlantè. L'épâs-sou de lai tchevétche aippretche les vînt centimètres. Maintenant que tos les ptchus sont chtopf, le pâ pyaintè en premie ât tirie feûs, ç'ât pai ci canâ qu'on enfûele le tchure de lai foinne. Ène peûfnèe de brése y ât embrûe, pe di petét bôs djunque enson. En lai leste, le hât di canâ que sié de tchemnèe ât foirmè. Aivo son peuce le tchairboûennie poiche ïn petét ptchu po lai femîre. Quaitre petéts beûyats sont eûvris tot â bés de lai foinne (qu'on aippél ptchus-de-pie) djeute po baiyie ïn po de tiraidge.



Duraint les diche djoués de cossnaidge di bôs les beurlîndyes di temps djuant tot piein. Djoués de pieudge, de bige pe d'oraidge poyant résavraie des chûrprijes po les tchairboûennies qu'ûevrant en totes sésos. Le bôs è cossnaie dèt être sa. Aichtôt lai foinne enfûelaie, l'hanne n'é pus ène minute d'erpôs; Euvri ô chôre les beûyats de tiraidge de djoué cmen de neût, ç'ât â coué des tros premies djoués d'aictivitès que lai foinne demainde le pus de survoyaince. Réyie lai tchalou ât ène quèchtion d'aroye. Aîye! vos

èz bîn âyi, ïn tchairboûennie aiveutchi pai les bruts de lai foinne, sait ce è fât poichie de novés ptchus ô bîn en chôre d'âtres. Se lai femîre ât biaintche, ç'ât ïn bon présaidge, se èlle ât bieuve dondgie, le fûe ât trap vigousse, le tchairbon sré marlie! Quéques

pallettes de faisi retcheyies â pie de lai foinne, mouéyie d'în rossoiyou d'âve pusi â Doubs baiye ène sôtche de molte odjoiyie po chtopfaie les éleûches, é tât content rebotaie les tchoses en ôedre. Embrure è nové di petét bôs dains lai tchemnèe que s'élair-dge è feure et è mesure di cossnaidge. Le petét bôs sré tchaipiè aidé ìn po pus grôs pe tassie aivo ìn chtécre po envouadgeaie lai foinne de s'aiffaïssie, pe d'aittairdgie le cossnaidge di bôs.

Lai neût dains sai cabouénatte voué èl épreuve de dremi, è réye lai soinnerie de son révoiye totes les doux hoûres po tchainpaie ìn eûye su son ovraidge, è rebote en ôedre se è fât.

Doze djoués pus doze neûts de ci traivaiye érouéynaint vos sôle le pus couéyat des hannes. Â soi di dozieme djoué, totes les éleûches, beûyats, ptchus, tchemnèe sont boûetchies po étôffaie totes doués de fûe. Les doux djouénèes seûyaintes, dite de réfrâtchèssement de lai foinne permât â tchairboûennie de réchoûchaie po entrepâre, tot trebi, lai tirie feûs di tchairbon. ìn cra, ìn rété de fé en main, bâlement è creûye ène petête euvreture â pie de lai foinne, traîe quèques tchairbons, hichtoire de s'aisuraie que tot le contenu â cossnaie daidroit. Ç'ât rédjoiyéssaint, ìn tchairbon des fîne-meux ât ébouélaie dôs les eûyes d'în tchairboûennie émervoiyie, haiyuroux di produit de son traivaiye.



Sains tchute, pai pallettes, è tire feûs le tchairbon encoué tive. Aivo sné, è traîe lai maîtère tot â toué de lai foinne. Les tieuvenèes sont rebôtchies âsstôt. Le pus petét couéraint d'oûere pe renfûelaie le tchairbon que vire tot content en brése, ço que n'ât pon è tchuâtre. Le tchaibon réfraîdi ât botè en sè. ìn bric-rend ne siè è ren... les aitchétous, pus qu'è n'en fât son dje lì dâs le maitîñ aivo loûes rcegnons pe quèques botoiyes. Ces envéllies int aimouénè ìn oûere de fête. Tot s'y prê-

te: le yê, l'ailombre dôs les aibres, le tchaint des ôsés, le tché-
tcheyement di Doubs. Qu'ée belle fîn de djouénée!

En lai demainde de quéques courieux, le tchairboûennie baiye
quéques renseignements su son traivaiye: empiaicement pe montaid-
ge de lai foinne, enfûelaidge mains sutot lai survoiyaince de lai
tchâlou â tchure di braisie. Le tchoix di bôs, ren que di bôs du,
djemais de saipîn, ci bôs ne vat ren po faire di tchairbon è eû-
saidges couérainc. Quaitre tonnes de bôs, tchairbouènaie d'aidroit
daint baiyie ène tonne de tchairbon. Lai graintou, lai sôtche de
bôs eûttilisè po faire ène foinne de tchairbon dint être préjies
è l'aivaince po obteni ïn bon produit.

Pe, d'aidjoutaie po chôre lai djâserie: aivoi di réchpèct po
tot ço que nos envirtole, ène saintè couéyatte, ne ren braquaie, être
en évoiye des beurlîndyes di cie. totes ces qualités baiyant ïn
Méêtre Tchairboènnie.

Le Coinuson.

